

pta, sed excerpta ex uetustioribus commentarijs, qui ad huius diuinatrici repræhensionem multo ante collecti fuerunt. Hos refutarunt docti uiri Bellantius, & alij quidam, & multæ leues & ieiunæ cauillationes obijciuntur, quarum repetitio longa, & refutatio non necessaria est. Prudentes uerissimo Galeni iudicio contenti sint, qui de ipsis astrorum effectionibus inquit: Sophisticum est manifestæ experientiae uelle contradicere. Addit autem, esse aliquas siderum ac luminis effectiones in elementis, & corporibus mixtis, plantis & animantibus manifesta experientia compertum est. Vt scimus ignem calidum esse, aquam humidam (sic enim loquar exempli causa) sic scimus corpora à Sole calefieri, à Luna humectari: Saturni & Martis coniunctionem in Leone æstus, & siccitates facere: Lunæ & Iouis coniunctionem in Cancro, augere humores.

Hæc cum perpetua experientia palam testetur, non dubia sunt, nisi quis Sophisticè, ut Anaxagoras, disputare uelit, Niuem atram esse. Cum igitur sint aliquæ effectiones astrorum, & earum animaduersio artem pepererit, non inanem esse hanc diuinatricem necesse est, sed metæ constituantur iam antea à Ptolemæo præscriptæ.

Lumen aduehit qualitates primas & proximas ex his ortas in alia corpora. De aëre his annis multis certissima testimonia uidimus, quæ coniunctiones & eclipses, æstuum, quæ humiditatum magnarum causa fuerint. Sed de homine dicamus.

Cras humanorum corporum, & si multum sumunt à materia seu à semine, tamen certum est eas ualde temperari potestate siderum, ut nati paulò ante coniunctionem cum Luna iam radijs Solis tegitur, longè sunt imbecilliores alijs. Rursus hi quibus fulgent magnæ Saturni & Iouis coniunctiones, Crasim longè habent fœliciorè. Sed longum esset exempla persequi, quæ congruere uidebit quicumque aspicere ea uolet.

De his effectibus, id est temperamentis & inclinationibus, quæ comitantur temperamenta loquimur, non referimus ad sidera omnes omnium hominum actiones & euentus. Vt igitur in Medica arte ex cognitione causarum, signorum, & effectuum ars extitit tum iudicandi, tum prædicendi multas corporum mutationes, & ea prædictio Physica, res concessa est, & aliena à superstitione, quia est aspectio diuinorum operum, causarum, signorum, & effectuum: Ita in hac diuinatrice iudicante ex siderum situ, causæ, signa, effectus aspiciuntur, & horum consideratio tantum est diuinorum operum aspectio. Quare & concessa est hæc ars, & aliena à superstitione. Sed non euagemur extra metas. Non affirmemus ea, quæ à potestate astrorum non oriuntur, nec misceamus sortes & illa genera diuinationum, quæ uocat Ptolemæus *α' ναιτιολόγητα*.

Postquam